

temporel; ils se trompent bien, disois-je en mon cœur, ce n'est pas mon corps qui m'ameine icy, mais le desir de sauuer mon ame, ie pensois aux biens de l'autre vie, & non pas aux commoditez de celle-cy que nous menons en terre. Parlons de son Baptesme.

Il s'y disposa de longue main par de grands desirs d'estre fait enfant de Dieu & de son Eglise, & par de grands regrets de ses offenses; il admiroit les effets de ce Sacrement que nous luy auions expliqué, il souhaittoit d'en auoir la iouissance. En fin le iour destiné s'approchant, il ieufna la veille, nous le menasmes à Kebec pour y receuoir ce Sacrement en la presence de nos François. Là il fut nommé Ignace par Monsieur Gand son Parrain. Sa modestie accompagnée d'une sainte liberté luy faisoit respondre avec grace & franchise [96] à toutes les interrogations qu'on luy fit. Il fut baptisé le Dimanche dernier iour d'Octobre, & le lendemain iour consacré à l'honneur de tous les saints, il se communia publiquement en la Chappelle de Kebec, les occupations que nous auons en ce temps-là furent cause que ie ne pûs pas si-tost l'interroger des sentimens que Dieu luy auoit donné dans la reception de ces deux grands Sacremens. Ie le fis deux iours apres par maniere de discours, luy demandant si son cœur n'auoit point resenty de ioye dans son Baptesme: Sa face s'épanouit à ceste demande, & son ame goustant vne autrefois les contètemens qu'elle auoit receuë en ces mysteres sacrez, fit fortir ces paroles de sa bouche. Estant à la porte de l'Eglise où on fait demeurer les Cathecumenes deuant leur Baptesme, il m'estoit à voir qu'on me tenoit là pour cognoistre ma derniere volonté, & pour sçauoir si ie croyois, & si en effect ie voulois estre Chrestien;